

Program mobiliti UTHM tingkat kualiti universiti

Batu Pahat: Universiti Tun Hussein Onn Malaysia (UTHM) kini dalam proses mendapatkan pengiktirafan QS Star Rating 2016/2017 selain mengetuai Program Mobiliti Pelajar Ke Luar Negara 2017 (Outbound dan Inbound) Tidak Berkredit membabitkan pertukaran penuntut ke dalam dan ke luar negara.

Naib Canselornya Profesor Dr Wahid Razzaly berkata, program itu satu inisiatif Bahagian Hal Ehwal Pelajar dan Akademik (HEPA) UTHM bagi memartabat dan meningkatkan impak serta kualiti universiti dalam menghasilkan penuntut cemerlang daripada pelbagai aspek.

"Program mobiliti penuntut UTHM ini dianjurkan sejak 2010 dan berjaya membawa seramai 1,026 penuntut keluar ke universiti di Jepun, Russia, Indonesia, Korea Selatan, United Kingdom, Australia dan Singapura.

"Secara dasarnya program berkenaan menjurus kepada aktiviti khidmat masyarakat, kebudayaan, keusahawanan, penyelidikan dan perpindahan ilmu kursus yang dipelajari penuntut selain memberi pendedahan kepada mereka mengenai suasana pengajaran dan pembelajaran di luar nega-



TIMBALAN Menteri Pengangkutan, Datuk Ab Aziz Kaprawi (kiri) melakukan gimik pelancaran Program Mobiliti Pelajar Ke Luar Negara 2017, di Dewan Terbuka UTHM, Batu Pahat.

ra," katanya.

Menurutnya, program itu bertujuan menjadikan program mobiliti penuntut ke luar negara sebagai program berimpak tinggi universiti berkenaan sekali gus melahirkan modal insan yang lengkap berbanding universiti lain.

"Untuk tahun ini, UTHM merancang melaksanakan program mobiliti penuntut ke luar negara membabitkan 20 destinasi di 10 negara termasuk Australia, Turki, Emiriah Arab Bersatu (UAE) dan Brunei.

"Sehubungan itu, seramai 22 penerima terdiri daripada pegawai dan penuntut menerima watakah pengisytiharan program mobiliti ke luar negara yang akan

dilaksanakan tahun ini," katanya ketika berucap dalam Majlis Perasmian Program Mobiliti Pelajar Ke Luar Negara 2017 di Dewan Terbuka UTHM, di sini, semalam.

Sementara itu, Timbalan Naib Canselor (Hal Ehwal Pelajar dan Alumni) HEPA UTHM Dr Asri Selamat berkata, penuntut boleh membangunkan minda cemerlang menerusi program yang memberi penekanan pembangunan modal insan secara lebih efektif.

"Sepanjang program berkenaan, peserta diminta membuat tugas tertentu seperti menyediakan diari dan membuat pembentangan di hadapan panel yang dilantik," katanya.